

Här Fernand Etgen  
President vun der  
Deputéiertechamber  
19, um Krautmaart  
L-1728 Lëtzebuerg

Lëtzebuerg, den 10. Mee 2021

Här President,

Sou wéi d'Chambersreglement et virgesäit, bieden ech lech, dës parlamentaresch Fro un den Här Energieminister an un den Här Finanzminister weiderzeleeden.

Am Wanter ze hëtzen a Raimlechkeeten am Summer ze killen, gehéiert zu deene wichtigste Grondbedierfnesser vun de Leit. Mat der Zounam vum Télétravail wäert de konkrete Besoin staark klammen, vu, datt d'Leit sech nu eebe mol méi doheem ophalen. Déi meescht Stéit zu Lëtzebuerg hëtzen aktuell mat Mazout, deen opgrond vun der politescher Fixéierung op d' These vum Mënsche gemaachte Klimawandel, allerdéngs och ënnert der Regierung hir Politik géint den Asaz vu fossile Brennstoffen an deementspreechend ënnert de Regime vun der Zäregassteier fält. Wéi den Här Energieminister dozou am Artikel "Tout, tout, tout sur la taxe CO2", deen den 1. Dezember 2020 am Lëtzebuurger Wort publizéiert gouf, zitéiert gëtt: "Maintenir les énergies fossiles à bas prix n'encouragerait pas à changer nos - mauvaises- habitudes". D'Heizung vun engem Haus an nach méi vun Apparementsgebaier mat Zentralheizung loossen sech awer net sou einfach austauschen. Et kascht deier, et muss eng qualifizéiert Firma disponibel sinn, et musse méiglecherweis vill Partien domat averstane sinn a vill Leit wëllen sech d'Maintenance vun hiren eegene véier Maueren och net bis an de leschten Detail vum Staat diktéiere loossen. Wien op den Datum vum 07.05.2021 zu Lëtzebuerg géif Mazout bestellen, misst duerfir TTC e Literpräis vu ronn 0,63 Euro bezuelen. Falls de Klimawandel géif sou antrieden, wéi vun der Regierung virausgesot, da wäert de Bedarf u Mazout fir ze hëtzen an deene nächste Joeren zousätzlech staark an d'Luucht goen, well d'Leit opgrond vu Wiederextremer jee no Saison entweder nach vill méi killen oder nach vill méi hëtze mussen. Bei de Betriber stellt sech de nämmechte Probleem an et ass dovun auszugehen, datt déi entspreechend héich Onkäschten sech negativ op hir Kompetitivitéit géifen auswierken.

Duerfir géif ech der Regierung gär des Froe stellen:

- 1) Kann d'Regierung op Basis vun engem hypothetesch Maartpräis, deen un der aktueller Situatioun orientéiert ass eng Modellrechnung presentéieren, wéi den Steuerdeel um Mazout fir ze hëtzen sech déi nächst Joere soll entwéckelen? Kéint d'Regierung dobäi w.e.g. separat op d'Entwécklung vum spezifeschen Zäregassteierdeel agoen?
- 2) Wéivill Zäregase sollen nom Kenntnisstand vun der Regierung duerch déi national Zäregassteier op Mazout fir ze hëtzen, fir d'Joren 2021, 2022, 2023, 2024 an 2025 agespuert ginn? Wéi héich ass dësen Undeel un de Mënsche gemaachten Zäregaser, déi an deene genannte Referenzperioden zu

- Lëtzebuerg sollen ausgestouss ginn? Kéint d'Regierung den nämmechte Chiffer w.e.g. och fir Europa a fir de globalen Undeel presentéieren, fir eng méiglechst objektiv Käschten-Notze Rechnung ze erméiglechen?
- 3) Kéint d'Regierung sech virstellen, bis op eng super reduzéiert TVA vun dräi Prozent sämtlech Steieren an Accise vum Mazout fir ze hëtze erfzehuelen, fir d'Follge vun deem vun hir selwer prognostizéierte Klimawandel sozial ofzefiedderen?

Mat déiwem Respekt,

Roy Reding  
Deputéierten

